

摘藻堂四庫全書薈要

集部

欽定四庫全書薈要

集部

宋詩鈔卷二

三

詳校官候選知縣臣吳國華



欽定四庫全書薈要卷二萬二百五十五

集部

宋詩鈔卷二

內閣中書舍人吳之振編

徐鉉騎省集鈔

鉉字鼎臣會稽人與弟鍇未弱冠以文行稱仕南唐  
三主歷官至吏部尚書右僕射機命制誥咸出其手  
文章議論與韓熙載齊名宋問罪江南請使見太祖  
乞存辨論不屈太祖亦嘉禮之後隨後主歸宋授太

子率更令改左散騎常侍累封東海郡開國侯檢校  
工部尚書卒年七十六精於篆隸修許氏說文自撰  
韻譜江南馮延巳曰凡人為文皆事奇語不爾則不  
足觀惟徐公率意而成自造精極詩治行道麗具元  
和風律而無渙忍纖阿之習初嗣主以讒貶移饒州  
適周世宗兵過淮鉉即榜小舟歸昇州賦詩有云一  
夜黃星照官渡本初何面見田豐其伉直如此大梁  
以後氣稍衰矣蓋情鬱為聲悽楚宛折則難言之

意多焉

寒食宿陳公塘上

垂楊界官道茅屋倚高坡  
月下春塘水風中牧豎歌  
折花閒立久對酒遠情多  
今夜孤亭夢悠揚奈爾何

登甘露寺北望

京口潮來曲岸平  
海門風起浪花生  
人行沙上見日影  
舟過江中聞櫓聲  
芳草遠迷楊子渡  
宿煙深映廣陵城  
游人鄉思應如橘  
相望須含兩地情

京口江際弄水

退公求靜獨臨川  
楊子江南二月天  
百尺翠屏甘露閣  
數帆晴日海門船  
波澄瀨石寒如玉  
草接汀蘋綠似煙  
安得乘槎更東去  
十洲風外弄潺湲

重遊木蘭亭

繚繞長堤帶碧潄  
昔年遊此尚青衿  
蘭橈破浪城陰直  
玉勒穿花苑樹深  
宦路塵埃成久別  
仙家風景有誰尋  
那知年長多情後  
重凭闌干一獨吟

送魏舍人仲甫為蘄州判官

從事蘄春興自長  
蘄人應識紫微郎  
山資足後拋名路  
莼菜秋來憶故鄉  
以道卷舒猶自適  
臨戎談笑固無妨  
如聞郡閣吹橫笛  
時望青谿憶野王

宿蔣帝廟明日遊山南諸寺

便返城闈尚未甘  
更從山北到山南  
花枝似雪春雖半  
桂魄如眉日始三  
松蓋遮門寒黯黯  
柳絲妨路翠參參  
登臨莫怪偏留戀  
遊宦多年事事諳

愛敬寺有老僧嘗遊長安言秦雍間事歷歷可聽  
因贈此詩兼示同行客

白首棲禪者嘗談灞滻遊能令過江客偏起失鄉愁  
室倚桃花崦門臨杜若洲城中無此景將子剝淹留

和殷舍人蕭員外春雪

萬里春陰乍履端廣庭風起玉塵乾梅花嶺上連天白  
蕙草堦前特地寒晴去便為經歲別興來何惜徹宵看  
此時鴛侶皆閒暇贈答詩成禁漏殘



從兄龍武將軍歿于邊戍過舊營宅作

前年都尉沒邊城  
帳下何人領舊兵  
徼外瘴煙沉鼓角  
山前秋日照銘旌  
笙歌却返烏衣巷  
部曲皆還細柳營  
今日園林過寒食  
馬蹄猶擬入門行

景陽臺懷古

六言

後主亡家不悔江南異  
代長春今日景陽臺上閒  
人何用傷神

寄駕部郎中

瞻

賤子乖慵性頻為省直牽交親每相見多在相門前君  
獨踈名路為郎過十年炎風久成別南望思悠然

秋日雨中與蕭贊善訪殷舍人於翰林座中作

野出西垣步步遲秋光如水雨如絲銅龍樓下逢閒客  
紅藥堦前訪舊知亂點乍滋承露處碎聲因想滴蓬時  
銀臺鎖合須歸去不惜餘歡盡酒卮

和明道人宿山寺

聞道經行處山前與水陽磬聲深小院燈影迥高房落

宿依樓角歸雲擁殿廊羨師閒未得早起逐班行

晚歸

暑服道情出煙街薄暮還風清飄短袂馬健弄連環水  
靜聞歸櫓霞明見遠山過從本無事從此涉旬間

除夜

寒燈耿耿漏遲遲送故迎新了不欺往事并隨殘歷日  
春風寧識舊容儀預慙歲酒難先飲更對鄉儺羨小兒  
吟罷明朝贈知己便須題作去年詩

正初答鍾郎中見寄

高齋遲景雪初晴  
風拂喬枝待早鶯  
南省郎官名籍籍  
東隣妓女字英英  
流年倏忽成陳事  
春物依稀有舊情  
新歲相思自過訪  
不煩虛左遠相迎

江舍人宅筵上有妓唱和州韓舍人歌辭因以寄  
良宵絲竹偶成歡  
中有佳人俯翠鬟  
白雪飄飄傳樂府  
阮郎憔悴在人間  
清風朗月長相憶  
佩蕙紉蘭早晚還  
深夜酒空筵欲散  
向隅惆悵鬢堪斑

寒食日作

厨冷煙初禁，門閒日更斜。  
東風不好事，吹落滿庭花。  
過社紛紛燕，新晴淡淡霞。  
京都盛遊觀，誰訪子雲家。

賀殷游二舍人入翰林江給事拜中丞

清晨待漏獨徘徊，霄漢懸心不易裁。  
閣老深嚴歸翰苑，夕郎威望拜霜臺。  
青綾對覆蓬壺晚，赤棒前驅道路開。  
猶有西垣廳記在，莫忘同草紫泥來。

送歐陽大監遊廬山

家家門外廬山路唯有夫君乞假遊  
案牘乍拋公署晚  
林泉已近洞天秋  
海潮盡處逢陶石  
江月圓時上庾樓  
此去蕭然好長往  
人間何事不悠悠

秋日廬龍村舍

置却人間事閒從野老遊  
樹聲村店晚草色古城秋  
獨鳥飛天外閒雲度隴頭  
姓名君莫問山木與虛舟

和蕭郎中小雪日作

征西府裏日西斜  
獨試新爐自煮茶  
籬菊盡來低覆水

塞鴻飛去遠連霞寂寥小雪閒中過斑駁輕霜鬢上加  
算得流年無奈處莫將詩句祝蒼華

中書相公谿亭閒宴依韻

李建勳

雨霽秋光晚亭虛野興迴沙鷗掠岸去溪水上堦來客  
傲風欹幘筵香菊在杯東山長許醉何事憶天台

寄饒州王郎中效李白體

珍重王光嗣交情尚在不蕪城連宅住楚塞並車游別  
後官三改年來歲六周銀鉤無一字何以緩離愁

寄歙州呂判官

任公郡占好山川，谿水縈迴路屈盤。  
南國自來推勝境，故人此地作郎官。  
風光適意須留戀，祿秩資貧且喜歡。  
莫憶班行重迴首，是非多處是長安。

宣威苗將軍貶官後重經故宅

蔣山南望近西坊，亭館依然鏤院牆。  
天子未嘗過細柳，將軍尋已戍燉煌。

史萬歲嘗  
謫戍燉煌

歌傾怪石山無色，零落圓

荷水不香為將為儒皆寂寞，門前愁殺馬中郎。



附池州薛郎中書因寄歙州張員外

新安從事舊臺郎直氣多才不可忘一旦江山馳別夢  
幾年簪紱共周行岐分出處何方是情共窮通此義長  
因附鄰州寄消息接輿今日信為狂

寄江都路員外

吾兄失意在東都聞說襟懷任所如已縱乖慵為傲吏  
有何關鍵制豪胥縣齋曉閉多移病南畝秋荒憶遂初  
知道故人相憶否嵇康不得嬾修書

送應之道人歸江西

曾騎竹馬傍洪崖二十餘年變物華  
客夢等閒過驛閣歸帆遙羨指龍沙  
名題小篆矜垂露詩作吳吟對綺霞  
歲暮定知迴未得信來憑為寄梅花

臨石步港

碕岸隨縈帶微風起細連綠陰三月後  
倒影亂峰前吹浪游鱗小黏苔碎石圓  
會將腰下組換取釣魚船

病題二首

性靈慵懶百無能  
唯被朝參遣夙興  
聖主優容恩未答  
丹經踈濶病相陵  
脾傷對客偏愁酒  
眼暗看書每愧燈  
進與時乖不知退  
可憐身計謾騰騰

人間多事本難論  
況是人間懶慢人  
不解養生何怪病  
已能知命敢辭貧  
向空咄咄煩書字  
與世滔滔莫問津  
金馬門前君識否  
東方曼倩是前身

寄江州蕭給事

夕郎憂國不憂身  
今向天涯作逐臣  
魂夢暗馳龍闕曙

嘯吟閒繞虎谿春  
朝車載酒過山寺  
諫紙題詩寄野人  
惆悵懦夫何足道  
自離羣後已同塵

和州酬江中丞見寄

賈傳南遷久  
江關道路遙  
北來空見雁  
西去不如潮  
鼠穴依城社  
鴻飛在沚寥  
高低各有處  
不擬更相招

和鍾郎中送朱先輩還京垂寄

分司洗馬無人問  
詞客殷勤輟棹過  
蒼蘚滿庭行徑小  
高梧臨檻雨聲多  
春愁盡付千杯酒  
鄉思遙聞一曲歌

且共勝遊消永日西岡風物近如何

送郝郎中為浙西判官

大藩從事本優賢幕府仍當北固前  
花繞樓臺山倚郭寺臨江海水連天  
恐君到即忘歸日憶我遊曾歷二年  
若許他時作閒伴殷勤為買釣魚船

陪王庶子遊後湖涵虛閣

東宮園

懸圃清虛乍過秋看山尋水上茲樓  
輕鷗的的飛難沒紅葉紛紛晚更稠  
風卷微雲分遠岫浪搖晴日照中洲

躋攀況有承華客如在南皮奉勝遊

柳枝辭十二首

把酒憑君唱柳枝也從絲管遽相隨逢春只合朝朝醉  
記取秋風葉落時

南園日暮起春風吹散楊花雪滿空不惜楊花飛也得  
愁君老盡臉邊紅

陌上朱門柳映花簾鉤半捲綠陰斜憑郎暫駐青驄馬  
此是錢塘小小家

夾岸朱欄柳映樓綠波平漫帶花流歌聲不出長條密  
忽地風回見綠舟

老大逢春揔恨春綠楊陰裏最愁人舊遊一別無因見  
嫩葉如眉處處新

濛濛堤畔柳含煙疑是陽和二月天醉裏不知時節改  
漫隨兒女打鞦韆

水閣春來乍減寒曉粧初罷倚欄干長條亂拂春波動  
不許佳人照影看

柳岸煙昏醉裏歸不知深處有芳菲重來已見花飄盡  
惟有黃鸝轉樹飛

此去仙源不是遙垂楊深處有朱橋共君同過朱橋去  
密映垂楊聽洞簫

暫別揚州十度春不知光景屬何人一帆歸客千條柳  
腸斷東風楊子津

仙樂春來按舞腰清聲偏似傍嬌嬈應緣鸞舌多情賴  
長向雙成說翠條



鳳笙臨檻不能吹  
舞袖當筵亦自疑  
唯有美人多意緒  
解衣芳態畫雙眉

貶官秦州出城作

浮名浮利信悠悠  
四海干戈痛主憂  
三諫不從為逐客  
一身無累似虛舟  
滿朝權貴皆曾忤  
繞郭林泉已徧遊  
惟有戀恩終不改  
半程猶自望城樓

過江

別路知何極  
離腸有所思  
登艫望程遠  
搖櫓過江遲  
斷

岸煙中失長天水際垂此心非橘柚不為兩鄉移

贈維揚故人

東京少長認維桑書劒誰教入帝鄉一事無成空放逐  
故人相見重淒涼樓臺寂寞官河晚人物稀疎驛路長  
莫怪臨風惆悵久十年春色憶維揚

秦州道中却寄東京故人

風緊雨淒淒川迴岸漸低吳州林外近隋苑霧中迷聚  
散紛如此悲歡豈易齊料君殘酒醒還聽子規啼

得浙西郝判官書未及報聞燕王移鎮京口因寄  
此詩問方判官田書記消息

秋風海上久離居曾到劉公一紙書淡水心情長若此  
銀鈎蹤跡更無如嘗憂座側飛鴉鳥未暇江中覓鯉魚  
今日京吳建朱邸問君誰共曳長裾

王三十七自京垂訪作此送之

失鄉遷客在天涯門掩苔垣向水斜只就鱗鴻求遠信  
敢言車馬訪貧家烟生柳岸將垂縷雪壓梅園半是花

惆悵明朝樽酒散夢魂相送到京華

寒食成判官垂訪因贈

常年寒食在京華今歲清明在海涯  
遠巷蹋歌深夜月隔墻吹管數枝花  
鴛鴦得路音塵濶鴻雁分飛道路賒  
不是多情成二十斷無人解訪貧家

送客至城西望圖山因寄浙西府中

枚叟鄒生笑語同莫嗟江上聽秋風  
君看逐客思鄉處猶在圖山更向東

九日雨中

茱萸房重雨霏微去國逢秋此恨稀  
目極暫登臺上望  
心遙長向夢中歸  
荼蘼路遠愁霜早  
兄弟鄉遙羨雁飛  
唯有多情一枝菊  
滿杯顏色自依依

寄外甥苗仲武

放逐今來瘴海邊  
親情多在鳳臺前  
且將聚散為閒事  
須信華枯是偶然  
蟬噪疎林村倚郭  
鳥飛殘照水連天  
此中惟欠韓康伯  
共對秋風詠數篇

寄從兄憲兼示二弟

別路吳將楚離憂弟與兄  
斷雲驚晚吹秋色滿孤城  
信遠鴻初下鄉遙月共明  
一枝棲未穩回首望三京

附書與鍾郎中因寄京妓越賓

暮春橋下手封書

海陵橋名

寄向江南問越姑  
不道諸郎少

歡笑經年相別憶儂無

亞元舍人不替深知猥貽佳作  
三篇清絕不敢輕酬  
因為長歌聊以為報  
未竟復得子喬校書示

問故兼寄陳君庶資一笑耳

海陵城裏春正月海畔朝陽照殘雪城中有客獨登樓

遙望天邊白銀闕

天帝以黃金白銀為宮闕

白雲闕下何英英雕鞍

繡轂趨承明閭門曉闢旌旗影玉墀風細佩環聲此處

追隨皆俊彥當年何事容疵賤懷鉛晝坐紫微宮焚香

夜直明光殿王言簡靜官司閒朋好殷勤多往還新亭

風景如東洛印嶺林泉似北山光陰暗度盃盃裏職業

未妨談笑間有時邀賓復攜妓造門不問都非是酣歌

叫笑驚四隣賦筆縱橫動千字任他銀箭轉更籌不怕

金吾司夜吏可憐諸貴賢且才時情物望兩無猜伊余

獨稟狂狷性褊量多言仍薄命吞舟可漏豈無恩負乘

自貽非不幸一朝削跡為遷客旦暮青雲千里隔離鴻

別鴈各分飛折柳攀花兩無色盧龍渡口問迷津瓜步

山前送暮春

去年三月三十日瓜步阻風

白沙江上曾行路青林花

落何紛紛漢皇昔幸回中道

昇元中扈駕東遊之路

極目牛羊卧

芳草舊宅重游盡隙荒故人相見多衰老禪智寺山光



橋風瑟瑟兮雨蕭蕭行杯已醒殘夢斷征途未極離魂  
消海陵郡中陶太守相逢本是隨行舊乍申拜起已開  
眉却問辛勤還執手精廬外榭最清幽一稅征車聊駐  
留閉門思過謝來客知恩省分寬離憂郡齋勝境有後  
池山亭茵閣互參差有時虛左來相召舉白飛觴任所  
為多才太守能撾鼓醉送金船間歌舞酒酣耳熱眼生  
花暫似京華歡會處歸來旅館還端居清風朗月夜窓  
虛駸駸流景歲云暮天涯望斷故人書春來憑檻方歎

息仰頭忽見南來翼足繫紅牋墮我前引頸長鳴如有

言開緘試讀相思字乃是多情喬亞元短韻三篇皆麗

絕小梅寄意情偏切

亞元詩云借問小梅應得信春風新自海邊來此篇尤嘉

金蘭

投分一何堅銀鈎置袖終難滅醉後狂言何足竒感君

知己不相遺長卿曾作美人賦立成今有責躬詩

鉉去春醉

中贈醉妓長歌酷為喬君所賞來篇所引故以謝之

報章欲托還京信筆拙紙窮

情未盡珍重芸香陳子喬亦解貽書遠相問寧須買藥

療羈愁只恨無書消鄙吝

子喬問藥物所要又問置書故有此句

游處當

時靡不同歡娛今日兩成空天子尚應憐賈誼時人未  
要嘲揚雄曲終筆閣緘封已翩翩驛騎行塵起寄向中  
朝謝故人為說相思意如此

送荊司錄歸京

早年聞有荊先生二十餘年道不行抵掌曾論天下事  
折腰猶悟俗人情老還上國歡娛少貧聚歸資結束輕  
遷客臨流倍惆悵冷風黃葉滿山城

還過東都留守周公筵上贈座客

賈生三載在長沙故友相思道路賒已分終年甘寂寞  
豈知今日返京華麟符上相恩偏厚隋苑留歡日欲斜  
明旦江頭倍惆悵遠山芳草映殘霞

送楊郎中唐員外奉使湖南

江邊微雨柳條新握節含香二使臣兩綬對懸雲夢日  
方舟齊泛洞庭春今朝草木逢新律昨日山川滿戰塵  
同是多情懷古客不妨為賦弔靈均

和表弟包穎見寄

平生中表最情親  
浮世那堪聚散頻  
謝朓却令歸省閣  
劉楨猶自卧漳濱  
舊遊半似前生事  
要路多逢後進人  
且喜新吟報强健  
明年相望杏園春

使浙西先寄燕王侍中

京江風靜喜乘流  
極目遙瞻萬歲樓  
喜氣龍葱甘露晚  
水煙淡沲海門秋  
五年不見鸞臺長  
明日將陪兔苑遊  
欲問平津門下吏  
相君還許吐茵不

驛中七夕

七夕雨初霽行人正憶家江天望河漢水館折蓮花獨  
坐涼何甚微吟月易斜今年不乞巧鈍拙轉堪嗟

贈浙西顧推官

盛府賓寮八十餘閉門高卧興無如梁王苑裏相逢早  
潤浦城中得信疎狼籍盃盤重會面風流才調一如初  
願君百歲猶強健他日相尋隱士廬

邵伯埭下寄南郵陳郎中

故人相別動經年候館相逢倍慘然顧我飲冰難輟棹

感君扶病為開筵，河灣水淺翹秋鷺。  
柳岸風微噪暮蟬，欲識酒醒魂斷處。  
謝公祠畔客亭前。

謫居舒州累得韓高二舍人書作此寄之

三峰煙靄碧臨谿，中有騷人理釣絲。  
會友少于分袂日，謫居多却在朝時。  
丹心歷歷吾終信，俗慮悠悠爾不知。  
珍重韓君與高子，殷勤書札寄相思。

舒人以潛曉  
天柱為三峰

和張先輩見寄二首

去國離羣擲歲華，病容憔悴媿丹砂。  
谿連舍下衣長潤，

山帶城邊日易斜，幾處垂鈎依野岸。  
有時披褐到鄰家，故人書札頻相慰。  
誰道西京道路賒。

清時淪放在山州，  
邛杖紗巾處處遊。  
日蒼茫悲鵬舍，  
水風陰濕散貂裘。  
雞鳴候旦寧辭晦，  
松節凌霜幾換秋。  
兩首新詩千里道，  
感君情分獨知丘。

印秀才至舒州見尋別後寄詩依韻和

羈游白社身雖屈，  
高步詞場道不卑。  
投分共為知我者，  
相尋多媿謫居時。  
離懷耿耿年來夢，  
厚意勤勤別後詩。



今日谿邊正相憶  
雪晴山秀柳絲垂

送彭秀才

賈生去國已三年  
裋褐閒行皖水邊  
盡日野雲生舍下  
有時京信到門前  
無人與和投湘賦  
媿子來浮訪戴船  
滿袖新詩好回去  
莫隨騷客醉林泉

移饒州別周使君

正憐東道感賢侯  
何幸南冠脫楚囚  
皖伯臺前收別宴  
喬公亭下艤行舟  
四年去國身將老  
百郡徵兵主尚憂

更向鄱陽湖上去青衫憔悴淚交流

避難東歸依韻和黃秀才見寄

慙慙逢人問所之東流相送向京畿  
自甘逐客紉蘭佩不料平民著戰衣  
樹帶荒村春冷落江澄霽色霧霏微  
時危道喪無才術空手徘徊不忍歸

酬郭先輩

太原郭夫子行高文炳蔚弱齡負世譽  
一舉游月窟

闕

仙籍及我竄羣舒向風心鬱鬱歸來

暮江上雲霧一披拂雷雨不下施猶作池中物念君介  
然氣感時思奮發示我數篇文與古爭馳突綵縟燦英  
華理深剖肌骨古詩尤精奧史論皆宏拔舉此措諸民  
何憂民不活吁嗟吾道薄與世長迂濶顧我徒有心數  
奇身正絀論兵屬少年經國須儒術夫子無自輕蒼生  
正愁疾

和集賢鍾郎中

石渠冊府神仙署當用明朝第一人腰下別懸新印綬

座中皆是故交親  
龍池樹色供清景  
浴殿香風接近鄰  
從此翻飛應更遠  
徧尋三十六天春

送黃梅江明府

江前為江夏令有善政今更宰小邑賦詩留別作此和之

封疆多難正經綸  
臺閣如何不用君  
江上又勞為小邑  
篋中徒自有雄文  
書生膽氣人誰信  
遠俗歌謠主不聞  
一首新詩無限意  
再三吟詠向秋雲

和蕭郎中午日見寄

細雨輕風采藥時  
褰簾隱几更何為  
豈知澤畔紉蘭客

來赴城中角黍期多罪靜思如剉磔赦書纔聽似含飴  
謝公制勝常閒暇願接西川敵手碁

送黃秀才姑孰辟命

世亂離情苦家貧色養難水雲孤棹去風雨暮春寒幕  
府才方急騷人淚未乾何時王道泰萬里看鵬搏

送王四十五歸東都

海內兵方起離筵淚易垂憐君負米去惜此落花時想  
憶看來信相寬指後期殷勤手中柳此是向南枝

夢游三首

魂夢悠揚不奈何  
夜來還在故人家  
香濛蠟燭時時暗  
戶映屏風故故斜  
檀的慢調銀字管  
雲鬟低綴折枝花  
天明又作人間別  
洞口春深道路賒

繡幌銀屏杳靄間  
若非魂夢到應難  
牕前人靜偏宜夜  
戶內春濃不識寒  
蘸甲遮觴纖似玉  
含詞忍笑膩於檀  
錦書若要知名字  
滿縣花開不姓潘

南國佳人字玉兒  
芙蓉雙臉遠山眉  
仙郎有約長相憶

阿母無猜不得知夢裡行雲還倏忽暗中攜手乍疑遲  
因思別後閒牕下織得迴文幾首詩

和翰長聞西樞副隣居夜宴

開筵別有隣居興卜夜應憐禁漏長舊友不期爭命駕  
新姬憑寵剝傳觴香煙結霧籠金鴨燭焰成花照杏梁  
京邑衣冠多勝賞鱸魚爭敢道思鄉

和清源太保寄湖州潘郎中

老大離羣一倍愁谿山風物且淹留醞成春酒誰斟酌

抄得新書自校讐莫似收之矜曠達須教子重讓風流  
恩門舊分知難忘題取新詩上郡樓

送蒯員外東遊舊治

百歲猶强健知君即地仙孤飛下華表太息問桑田故  
吏今誰在高名昔共傳伊余亦遺老相送一潸然

送王監丞之歷陽

歎息曾遊處江邊故郡城青襟空皓首往事似前生綠  
綬君重綰華簪我尚榮年衰俱近道莫話別離情



奉和武功學士舍人寄贈文懿大師

舊國荒涼成黍稷故交危脆似琉璃  
高人獨喜湯師在手把新文數道碑

文似春花鋪曉陌思如泉涌注長江  
詩情道性知無夢頻見殘燈照曙牕

已潔心源超世表却緣詩句有時名  
初聞行業如耆宿及見容顏是後生

和錢祕監與邊

筵上詩題共筆牀  
樽前酒興話高陽  
心清自覺官曹簡  
院靜先知節候涼  
南國少年推貴重  
東堂前輩讓賢良  
好看雙鳳追飛處  
胡粉新塗紫界牆

送周郎中還司

憶在廬山始識君  
當時唯擬共眠雲  
那知身計關前定  
却向人間逐世紛  
紫閣峰前欣獨往  
銀臺門裏歎離羣  
青囊舊有登真訣  
莫遣閒人取次聞

送高先輩南歸

鄉國悲前事風光屬後生  
名從天上得身入故都行  
草色初裁綬鵬飛不算程  
自憐枯朽思相送剩含情

送曾秀才

淦水神仙宅仙山夾縣樓  
王孫好詩句歸詠故鄉秋  
紫竹遮書幌紅蕉拂釣舟  
東堂有平路莫謁外諸侯

寄玉笥山沈道士

珍重江南沈鍊師未曾相識久  
相思已全真氣能從俗  
不墜家風善賦詩玉笥共遊知  
早晚金貂迴顧覺喧卑

多慙書札遙相問更望刀圭換白髭

和蕭少卿見慶新居

湘浦懷沙已不疑京城賜第豈前期  
鼓聲到晚知坊遠山色來多與靜宜  
簪履尚應憐故物稻梁空自媿華池  
新詩問我偏饒思還念鷦鷯得一枝

又和

驚蓬偶駐知多幸斷鴈重聯慙素期  
當戶小山如舊識上牆幽蘚最相宜  
清風不去因栽竹隙地無多也鑿池

更喜良隣有佳樹綠陰分得近南枝

送彭秀才南遊

問君孤棹去何之玉筍春風楚水西  
山上斷雲分翠靄林間晴雪入澄溪  
琴心酒趣神相會道士仙童手共攜  
他日時清更隨計莫如劉阮洞中迷

和明上人除夜見寄

酌酒圍爐久愁襟默自增長年逢歲暮多病見  
兵興夜色開庭燎寒威入硯冰湯師無別念吟坐一燈凝

送從兄赴臨川幕

梁王籍寵就東藩還召鄒枚坐兔園今日好論天下事  
昔年曾受主人恩石頭城下春潮滿金柅亭邊綠樹繁  
唯有音書慰離別一杯相送別無言

送陳先生之洪井寄蕭少卿

聞君仙袂指洪崖我憶情人別路賒知有歡娛遊楚澤  
更無書札到京華雲開驛閣連江靜春滿西山倚漢斜  
此處相逢應見問為言搔首望龍沙

送龔明府九江歸省

茂宰辭官去扁舟著綠衣  
湓城春酒熟廬阜野花稀  
解纜垂楊綠開帆宿鷺飛  
一朝吾道泰還逐落潮歸

和江西蕭少卿見寄二首

亡羊岐路媿司南二紀窮通聚散三  
老去何妨從笑傲  
病來看欲嬾朝參離腸似線常憂斷  
世態如湯不可探  
珍重加餐省思慮時時斟酒壓山嵐

身遙上國三千里名在朝中二十春  
金印不須辭入幕

麻衣曾此歎迷津  
卷舒由我真  
齊物憂喜忘心  
即養神  
世路風波自翻覆  
虛舟無計得沉淪

晚憇白鶴廟寄句容張少府

日入林初靜  
山空暑更寒  
泉鳴細巖竇  
鶴唳眇雲端  
拂榻安碁局  
焚香戴道冠  
望君殊不見  
終夕凭欄干

題紫陽觀

南朝名士富仙才  
追步東鄉遂不迴  
丹井自深桐暗老  
祠宮長在鶴頻來  
巖邊桂樹攀仍倚  
洞口桃花落復開



惆悵霓裳太平事一函真跡鏤高臺

贈奚道士

名含象

奚生曾有洞天期猶傍天壇摘紫芝處世自能心混沌  
全真誰見德支離玉霄壁閑人長在金鼎功成俗未知  
他日飈輪謁茅許願同雞犬去相隨

題白鶴廟

平生心事向玄關一入仙鄉似舊山白鶴唳空情眇眇  
丹砂流澗莫潺潺嘗嗟多病嫌中藥擬問真經乞小還

滿洞煙霞互陵亂何峰臺榭是蕭閒

奉和七夕應令

今宵星漢共晶光應笑羅敷嫁侍郎斗柄易傾離恨促  
河流不盡後期長靜聞天籟疑鳴佩醉折荷花想艷粧  
誰見宣猷堂上宴一篇清韻振金鐺

又和八日

微雲疎雨淡新秋曉夢依稀十二樓故作別離應有以  
擬延更漏共無由那教人世長多恨未必天仙不解愁

博望苑中殘酒醒  
香風佳氣獨遲留

和印先輩及第後獻座主朱舍人郊居之作

成名郊外掩柴扉  
樹影蟬聲共息機  
積雨暗封青蘚徑  
好風輕透白莎衣  
嘉魚始賦人爭誦  
荆玉頻收國自肥  
獨坐公廳正煩暑  
喜吟新詠見玄微

印以南有嘉魚賦及第

和致仕張尚書新創道院

梓澤成新致  
金丹有舊情  
挂冠朝睡足  
隱几暮江清  
藥圃分輕綠  
松窓起細聲  
養高寧厭病  
默坐對諸生

尚書時有

瘖疾

和尉遲贊善秋暮僻居

登高節物最堪憐  
小嶺疎林對檻前  
輕吹斷時雲縹緲  
夕陽明處水澄鮮  
江城秋早催寒事  
望苑朝稀足晏眠  
庭有菊花樽有酒  
若方陶令媿猶賢

陪鄭王相公賦簷前垂冰應教依韻

牕外虛明雪乍晴  
簷前垂溜盡成冰  
長廊瓦疊行行密  
晚院風高寸寸增  
玉指乍拈簪尚愧  
金堦時墜磬難勝

晨飡堪醒曹參酒自恨空腸病不能

和尉遲贊善病中見寄

仙郎移病暑天過却似冥鴻避尉羅  
晝夢乍驚風動竹  
夜吟時覺露霑莎  
情親稍喜貧居近  
性嬾猶嫌上直多  
望苑恩深期勿藥  
青雲岐路未蹉跎

池州陳使君見示游齊山詩因寄

往歲曾遊弄水亭  
齊峰濃翠暮烟橫  
哀猿出檻心雖喜  
傷鳥聞弦勢易驚  
病後簪纓殊寡興  
老來泉石倍關情

今朝池口風波靜遙賀山前有頌聲

再領制誥和王明府見賀

蹇步還依列宿邊拱宸重認舊雲天自嗟多難飄零困  
不似當年膽氣全雞樹曉花疎向日龍池輕浪細含煙  
從來不解為身計一葉悠悠任大川

和方秦州見寄

逐客恹恹重入京舊愁新恨兩難勝雲收楚塞千山雪  
風結秦淮一尺冰置醴筵空情豈盡投湘文就思如凝

更殘月落知孤坐遙望船窓一點星

奉使九華山中塗遇青陽薛郎中

故人相別動相思此地相逢豈素期九子峰前閒未得  
五谿橋上坐多時甘泉從幸余知忝宣室徵還子未遲  
且喜一杯消別恨野花風起便離披

南都遇前嘉魚劉令言游閩嶺作此與之

我持使節經韶石君作閒遊過武夷兩地山光成獨賞  
隔年鄉思暗相知洪涯壇上長岑寂孺子亭前自別離

珍重分岐一杯酒強加飡飯數吟詩

廬陵別朱觀先輩

桂籍知名有幾人翻飛相續上青雲  
解憐才子寧唯我遠作卑官尚見君  
嶺外獨持嚴助節官中誰羨長卿文  
新詩試為重高詠朝漢臺前不可聞

文或少卿文山郎中交好深至二紀已餘睽別數  
年二子長逝奉使嶺南塗次南康弔孫氏之孤  
于其家覩文或手書於僧舍慷慨悲歌留題此



詩

孫家虛座弔諸孤  
張叟僧房見手書  
二紀歡遊今若此  
滿衣零淚欲何如  
腰間金印從如斗  
鏡裏霜華已滿梳  
珍重遠公應笑我  
塵心唯此未能除

奉和右省僕射西亭高卧作

院靜蒼苔積  
庭幽怪石欹  
蟬聲當檻急  
虹影向簷垂  
晝漏猶憐永  
叢蘭未覺衰  
疎篁巢翡翠  
折葦覆鸕鷀  
對酒襟懷曠  
圍碁旨趣遲  
景皆隨所尚  
物各遂其宜  
道與時

相會才非世所羈賦詩貽坐客秋事爾何悲

柳枝詞十首

座中  
應制

金馬詞臣賦小詩梨園弟子唱新詞君恩還似東風意  
先入靈和蜀柳枝

百草千花共待春綠楊顏色最驚人天邊雨露年年在  
上苑芳華歲歲新

長愛龍池二月時  
璿璣金線弄春姿  
假饒葉落枝空後  
更有梨園笛裏吹

綠水成文柳帶搖東風初到不鳴條  
龍舟欲過偏留戀  
萬縷輕絲拂御橋

百尺長條浣麴塵詩題不盡畫難真  
憑君折向人間種  
還似君恩處處春

風暖雲開晚照明翠條深映鳳凰城  
人間欲識靈和態  
聽取新詞玉管聲

醉折垂楊唱柳枝金城三月走金羈  
年年為愛新條好  
不覺蒼華也似絲

新春花柳競芳姿  
偏愛垂楊拂地枝  
天子徧教詞客賦  
宮中要唱洞簫詞

凝碧池頭蘸翠漣  
鳳凰樓畔簇晴煙  
新詞欲詠知難詠  
說與雙成入管絃

侍從甘泉與未央  
移舟偏要近垂楊  
櫻桃未綻梅花老  
折得柔條百尺長

九日落星山登高

秋暮天高稻穗成  
落星山上會諸賓  
黃花泛酒依流俗

白髮滿頭思故人  
巖影晚看雲出岫  
湖光遙見客垂綸  
風煙不改年長度  
終待林泉老此身

十日和張少監

重陽高會古平臺  
吟徧秋光始下來  
黃菊後期香未減  
新詩捧得眼還開  
每因佳節知身老  
却憶前權似夢回  
且喜清時屢行樂  
是非名利盡悠哉

陳侍郎宅觀花燭

今夜銀河萬里秋  
人言織女嫁牽牛  
珮聲嘹亮和金奏

燭影熒煌映玉鈎座客亦從天子賜更籌須為主人留  
世間盛事君知否朝下鸞臺夕鳳樓

送蕭尚書致仕歸廬陵

江海分飛二十春重論前事不堪聞主憂臣辱誰非我  
曲突徙薪唯有君金紫滿身皆外物雪霜垂領更離羣  
鶴歸華表望不盡玉筍山頭多白雲

和鍾太監泛舟同遊見示

潮溝橫趣北山阿一月三遊未是多老去交親難暫捨

閒中滋味更無過谿橋樹映行人渡  
村徑風飄牧豎歌  
孤棹亂流偏有興  
滿川晴日弄微波

又和游光睦院

寺門山水際清淺  
照孱顏客櫂晚  
維岸僧房猶掩關  
日華穿竹靜雲影過堦閒  
箕踞一長嘯  
忘懷物我間

送陳秘監歸泉州

風滿潮溝木葉飛  
水邊行客駐驂騑  
三朝恩澤馮唐老  
萬里鄉關賀監歸  
世路窮通前事遠  
半生談笑此心違

離歌不識高堂慶特地令人淚滿衣

又聽霓裳羽衣曲送陳君

清商一曲遠人行桃葉津頭月正明此是開元太平曲  
莫教偏作別離聲

宋詩鈔卷二



欽定四庫全書薈要卷二萬二百五十六

集部

宋詩鈔卷三

內閣中書舍人吳之振編

韓琦安陽集鈔

琦字稚圭相州安陽人弱冠舉進士名在第二方  
唱名太史奏日下五色雲見累官至右僕射侍中歷  
儀衛魏三國公出備兩鎮輔三朝立二帝決大策安  
社稷制西夏出入將相事具史傳不載卒年六十八

大星隕於治所櫪馬皆驚單贈尚書令謚忠獻詩率  
臆得之而意思深長有鍛鍊所不及理趣流露皆賢  
相識度其題劉御藥畫冊語云觀畫之術維逼真而  
已得真之全者絕也得多者上也非真即下矣人謂  
此術不獨觀畫即可觀人物竊謂惟詩亦然魏公勲  
業彪炳直無暇于筆墨爭長然語窺閫奧無他此道  
得也

夜合

俗人之愛花重色不重香吾今得真賞以矯時之常所  
愛夜合花清芬踰衆芳葉葉自相對開歛隨陰陽不慚  
厯草滋獨擅堯階祥得此合歡名憂忿誠可忘茸茸紅  
白姿百和從風颺沈水燎庭檻薰陸紛纓裳彌月固未  
歇况茲夏景長凡目不我貴馥烈徒自將仲尼失滅明  
史遷疑子房以貌不以行舉世同悲傷予欲先馨德羣  
艷孰可方直饒妖牡丹須讓花中王

蜂蠆

事小不可忽義或戒蜂螫蜂螫之中人始意脫已害人  
今怒一蟲為報速睚眦白晝擣危巢夜燭窮纖介必獲  
而後已立死以為快彼誠蓄微毒謂已有所賴失於小  
不忍而自取糜壞吁嗟陰巧徒毒邁蜂螫大包潛中善  
良斷腕未足駭小或一身危甚則家族逮淵微如鬼神  
無隙可漏敗君子被戕賊守道不為怪有時醜迹露事  
或無可奈一旦吾道行乃寘之度外使其自愧縮似不  
容覆載非力不足較顧有盛德在陰巧既常幸蜂螫胡

不貸

啄木

剝剝復卜卜意若念良木營營求蠹心未獲空我腹或  
露一襠紅或展雙翅綠捷緣都盧撞響弄羯鼓曲搜索  
不知疲利嘴信摧禿忽爾破姦穴種類無遺族內孽固  
難辨一發知潛伏彼實害珍材盡殄此非酷直疑天意  
深不使嗜梁肉專為衆蠹仇待飫弗與足如令知庶味  
恣擇蟲與粟杞梓任陰賊長喙罷攻觸飽食作羣飛時

下泉沼浴歸鳴涼樹陰暮趨高枝宿

來鳳

來鳳趨社期翩若天外至徘徊大廈間汲汲營巢意中  
心有所托自謂得其地銜泥兩吻瘡旦暮不少憩主人  
愛高堂病爾如疣贅爾巢屢膚寸長挺輒摧墜胡為不  
識嫌又續前功棄何處無蓬茅自足為生計不爾卵而  
覆其禍愈非細予既傷爾愚竊復探爾志孜孜不忍去  
欲動主人義萬一憐其勤庶獲息我類巨棟既不撓出

處安且貴其能無報乎唯守信無貳年年應候來馴狎  
如兒稚雙雙軒戶前為君作嘉致不學君家客去就惟  
勢利微羽一知歸至死不他詣

答孫植太博後園宴射

花稍點紅牙綠茁宴亭爽塏棚雲列呼賓習射次序升  
體裁人人矜勇挫六鈞力副百中藝由基注目老羿拽  
支左屈右何太工象弭急收如列缺須臾一鏑入鵠心  
畫鼓連轟盡聲唱後者審固意愈精有時大呼劈箭筈

惜哉最是毫釐差，采侯似動筭微撇。分明角勝各記暈，將終或為一箭奪當筵。主籌令難犯大白時，舉出正罰此禮自古尤。所重矍圃去留宜，有別五善大抵主和容。不止穿楊與穿札，因憶當年黠羌叛。非才誤授將軍鉞，帳下貔貅十萬師。力過生犀心似鐵，大仁未許覆兇巢。飭謹封陞禦，侵越悍夫猛士志。待騁貯填憤氣，何由洩正值高秋天。氣寒塞場霜重嚴，風刮約束偏裨整隊兵。旌旗爍電戈矛雪，驅出長郊閱奇陣。離合應麾皆有節。



次引精銳較絕技控弦命中無虛發氣豪馬健走危坡  
直下千尋未嘗廢收軍校獵圍平原犬順人呼鷹解絀  
山麋衝軼犯勁矢岡兔奔逃迷狡穴大鵬盤空不輕搏  
老狐仰視肝膽裂駐鞍賞獲犒部曲浪瀉酒車輪染血  
將軍未酣衆心醉耳後風生鼻頭熱此日淮藩奉寬詔  
朱輪慢輶行春轍鈴索聲沉訟牒稀優游大可養疎拙  
斜蒿青青鱸膾新公醪香重醅才醺射堂對客且相娛  
不妨樂事陶嘉月襟懷聊與水雲閒夢魂猶寄關山濶

逢辰未立赫然勲破的求功真瑣屑欲得心如外貌歡  
報國之誠盡攄豁

廣陵大雪

淮南常歲冬猶燠今年陰沍何嚴酷黑雲漫天一月昏  
大雪飛揚平壓屋風力軒號助其勢擺撼琳琅摧凍木  
通宵徹晝不暫停堆積樓臺滿溪谷有時造出可憐態  
柳絮梨花亂紛撲乘溫變化雨聲來度日階庭恣淋漓  
幾縈寒霰不成絲驟集疎簷還挂瀑蟄蛙得意欲跳擲

幽鷺無情成挫辱，曾魚江叟水透蓑。  
賣炭野翁泥沒輻，閭閻細民誠可哀。  
三市不喧游手衆，牛衣破解突無煙。  
餓犬聲微饑子哭，我聞上天主時澤。  
亦有常數滋農穀，膏潤均於一歲中。  
是謂年豐調玉燭，比來盛冬過爾多。  
却慮麥秋欠霑足，太守憂民仰天祝。  
願噓氛霾看晴旭，望晴不晴無奈何。  
擁被醉眠頭更縮。

和袁陟節推龍興寺芍藥

廣陵芍藥真奇美，名與洛花相上下。  
洛花年來品格卑。

所在隨人趨高價接頭着處騁新妍輕去本根無顧藉  
不論姚花與魏花只供俗目陪妖姹廣陵之花性絕高  
得地不移歸造化大豪大力或強遷費盡擁培無艷冶  
東君固是花之主千葩萬萼從榮謝似矯東君泛愛心  
枉殺春風不肯嫁遂令天下走香名髣髴丹青競誇詫  
以此揚花較洛花自合揚花推定霸其間絕色可粗陳  
天工著意誠堪訝仙家冠子鏤紅雲金線粧治無匹亞  
旋心體弱不勝枝寶髻欹斜猶墮馬冰雪肌膚一纈斑

新試守宮明似赭雙頭兩兩最多情象物更呈鞍面窠  
樓子亭亭欠姿媚特有怪狀堪圖寫見者方知畫不真  
未見直疑傳者詐前賢大欲巧賦詠片言未出心先怕  
天上人間少其比不似餘芳資假借我來淮海涉三春  
三訪龍興舊僧舍問得龍興好事僧每歲看承不敢暇  
後園栽植雖甚蕃及見花成由取捨出羣標致必驚人  
方徙矮壇臨大廈客來只見軒檻前國艷天姿相照射  
因知靈種本自然須憑精識能陶冶君子果有育材心

請視維揚種花者

苦熱

皇祐辛卯夏六月朔伏暑始伏之七日大熱極炎苦赫  
日燒扶桑焰焰指亭午陽烏自焦鑠垂翅不西舉炙翻  
四海波天地入烹煮蛟龍竄潭穴汗喘不敢雨雷神抱  
桴逃不顧車裂鼓豈無堂室深氣鬱如炊釜豈無臺榭  
高風毒如遭蠱直疑萬類繁盡欲變脩脯嘗聞崑閬間  
別有神仙宇雷散滌煩襟玉漿清濁腑吾欲飛而往於

義不獨處安得世上人同日生毛羽

荅章望之秘校惠詩求古瓦硯

魏宮之廢知幾春其間萬事成埃塵唯有昭陽殿瓦不  
可壞埋沒曠野迷荒榛陶甄之法世莫得但貴美璞踰  
方珉數百年來取為硯墨光爛發波成輪求之日盛得  
日少片材無異圭璧珍巧工近歲知衆寶雜以假偽窺  
錢緡頭方面凸緊難別千百未有三二真我來本邦責  
鄴令朝搜暮索勞精神遺基壞地徧剝窟始獲一瓦全

元淳鮮斑著骨尚乾翠夜雨點漬痕如新當時此復近  
簷溜印以篆字花其唇磨礧累日喜成就要完舊質知  
無倫吾才寡陋不足稱思與好古能文人好古能文今  
者誰武寧秘書章表民無詩尚欲兩手拊何況大雅之  
奏聞鏗純

荅陳舜俞推官惠詩求全瓦古硯

鄴宮廢瓦埋荒草取之為硯成堅好求者如麻幾百年  
宜乎今日難搜討吾邦匠巧世其業能辨壞竒幼而老



隨材就器固不遺大則梁棟細芬橈必須完者始稱珍  
何殊巨海尋三島荆人之璧尚有瑕夏后之璜豈無考  
況乎此物出坏陶千耕萬劓常翻攪吾今所得不專全  
秘若英瑤藉文繅君詩苦擇未如意持贈只虞笑絕倒  
君不見鎮圭尺二瑁四寸大小雖異皆君寶

觀胡九齡員外畫牛

丹青之筆奪造化能者幾何登品錄蛟龍獍惡鬼神怒  
更工不接時人目有形之物至者稀是否難欺衆所矚

絳臺胡掾文章外偏向畫牛其好酷海內馳名三十年  
得者珍藏過金玉老來纔始着青衫養親不及朝家祿  
前日野服忽相過云訪恩知走京轍微風入指未能畫  
示我蠟本數十幅採撫諸家百餘狀毫端古意多含蓄  
鬪者取力全在角臥者稱身全在腹立者髣髴精神慢  
背者分數頭項促行者動作皆得羣乳者顧視真憐犢  
當流汨戲益自在欲渡或疑猶蓄縮從容飲嚙得天真  
荷鞭時有兒童牧或橫一笛坐牛背便是無聲太平曲

江天雨雪易溟濛風勢掀號摧古木歌斜簑笠趁牛歸  
蕭疎暮景煙邨宿奇哉胡掾老筆不可到戴叟重生須  
死伏吾觀諸牛之態雖盡妙尚有所遺思未熟牛於生  
民功最大不畫牛功牛亦辱胡君胡君聽我言別選輕  
綃成巨幅寫出區區耒耜勤使知天下由吾方食足

次韻和于淵學士春雨

天幕沉沉淑氣溫雨絲輕軟墜雲根洗開春色無多潤  
染盡花光不見痕寂寞畫樓和夢鎖依微芳樹過人昏

堂虛座密珠簾下試問淳于醉幾樽

和春卿學士柳枝詞五闋

樓前輕雪未全銷偷得春光入嫩條似向東風猶綽約  
可能渾忘舞時腰

陌間宮古綠烟迷惹盡春愁困拂堤却為多情足離恨  
故教溝水亦東西

章街風曉起新眠寒食輕陰未雨天無限青絲拂遊騎  
一生芳意負金鞭

淡煙輕日簇誰家微出青旗一帶斜對景似嫌春意老  
更搖疎影掃殘花

畫橋南北水連天纔聽鶯聲又晚蟬長使離魂容易斷  
春風秋月自依然

和春卿學士上元罷燈

絲竹沉聲月泛波警宵方喜罷誰何樓深酒密客留易  
路遠香殘人去多寒燭倚蓮猶結淚淡雲歸隴不停歌

那知夢穩瀛洲上正是鈞天九奏和

是夕館宿聞  
宮中奏樂

再賦柳枝詞二闕

曲江風暖曉陰斜，翠色相宜拂鈿車。  
自是春眠慵未起，日高人困又飛花。

葉葉新長約黛蛾，絲絲輕軟任風梭。  
啼鶯便學歌喉轉，知是春來舞意多。

上巳

遠道今逢祓禊辰，雨餘風物一番新。  
等閒臨水還思舊，取次看花便當春。  
絮雪暖迷西苑路，車雷晴起曲江塵。

臺英正約尋芳會誰是山陰作序人

寓目

擁傳修途倦逢春旅思長遠煙含樹色細雨起塵香隴  
麥成行綠林鶯並對黃揚鞭聊自慰舉目見韶光

使回戲成

專對慙非出使才拭圭申好斂旌回禮煩偏苦元正拜

北廷元日  
拜禮最煩

戶大猶輕永壽杯

永壽北朝元辰節名  
其日以大白酌南使

歌枕

頓無歸夢擾據鞍潛覺旅懷開明朝便是侵星去不怕

東風拂面來

柳絮二闋

慣惱東風不定家  
高樓長陌奈無涯  
一春情緒空撩亂  
不是天生穩重花

絮雪紛紛不自持  
亂愁縈困滿春暉  
有時穿入花枝過  
無限蜂兒作隊飛

中秋月

月滿中秋夜  
人人惜最明  
悲歡徒自感  
圓缺本無情  
天



外有相憶世間多不平  
嫦娥難借問寂寞起西傾

謝丹陽李公素學士惠鶴

高籠攜得意何勤  
玉樹慙無可待君  
只愛羽毛欺白雪  
不知魂夢託青雲  
孤標直好和松畫  
清唳偏宜帶月聞  
自有三山歸去路  
莫辭時暫處雞羣

重九會光化

誰言秋色不如春  
及到重陽景自新  
隨分笙歌行樂處  
菊花萸子更宜人

春晴

霽色破春昏  
高樓日未曛  
林梢零舊雨  
山頂入殘雲  
醉粉勻花頰  
風羅皺水紋  
踏青人誤約  
芳思幾紛紛

春霖

咫尺東郊路  
春霖絕未通  
銷閒生奕思  
醒睡費茶功  
樓迥昏昏霧  
窻寒霎霎風  
待晴桑陌上  
五馬恣毵瓏

登西大悲閣

藹藹西藍閣  
煩襟一望開  
山川歸盛德  
姦傑委沈埃  
城

迥雲連堞峰間草蔽臺誰知太守意不為納涼來

### 新館

宴宇新成苦未嘉忽膺朝委易軍牙張侯暫喜留歡客

開檻憑誰種好花北沼不難平釣岸釣岸未成西峰猶欠入

窗紗城樓未立後賢政敏多餘暇高會何妨月影斜

### 北塘避暑

盡室林塘滌暑煩曠然如不在塵寰誰人敢議清風價  
無樂能過白日閒水鳥得魚長自足嶺雲含雨只空還

酒闌何物醒魂夢萬柄蓮香一枕山

髮白有感

區區邊朔有何成三失流年只自驚無一事來頭尚白  
白人頭處豈堪行

感事

一來邊障地走馬過三秋萬緒事常擾九分春又休  
花誰在目霜雪只侵頭縱得風光住風光可奈憂

北塘春雨

葉葉輕雲帳薄羅坐看膏澤洒庭柯風前芳杏紅香減  
煙外垂楊綠意多聲落簷牙飛短瀑點勻池面起圓波  
晴來西北凭欄望拂黛遙峰濯萬螺

寄題廣信軍四望亭

西北雲高拂女牆危亭虛豁望中長田間堤陌成新險  
天外江山是舊疆古道入秋漫黍稷遠坡乘晚下牛羊  
凭欄多少無言恨不在歸鴻送夕陽

閱古堂前植菊二本九月十八日花猶未開因以

小詩嘲之

只趣重陽選菊栽，當欄殊不及時開。  
風霜日緊猶何待，甚得迎春見識來。

後園閒步

池圃足高趣，公餘事少關。  
幽禽聲自樂，流水意長閒。  
近竹花終俗，過欄草費刪。  
心休誰似我，官府有青山。

觀稼回北園席上

郊原飛隼拂晴霓，秋入豐年未慘悽。  
嘗酒管絃先社集，

北人社前一日親  
賓相會謂之嘗酒

捺卷禾黍極雲齊雪鋪蕎麥花漫野  
黛抹蔓菁菜滿畦區脫狴牢無一事山翁贏得醉如泥

### 壬辰重九即席

中山風物有前緣經賞重陽第五年  
莫為素毛悲晚歲且吹黃菊酌芳筵  
退求僻郡疑邀寵甘老窮邊似好權  
笑問此身何計是不如嘉節倒垂蓮

### 離天威驛

早發天威驛深春尚薄寒  
龍蛇盤道路波浪卷峰巒  
古

木條初聳新流勢未湍忠臣方叱馭更險不辭難

過故關

春入并州路羣芳夾故關前騶驅弩過別境荷戈還古  
戎餘荒堞新耕入亂山時平民自適白首樂農間

出山口

待曉出山口溟濛雨乍晴始知經盡險終得坦然平草  
樹開春意川原豁眼明吏民當自信竹馬不須迎

次韻和都運崔諫議寄示立春前一日宿嵐谷山



程

絕塞風霜正樹威不知韶律起從微  
十千酒且迎春酌  
五九寒須伴臘歸破屐好山連  
日上費詩嬌雪著人飛  
屬封所過皆蒙惠民吏應如挾纊衣

六月六日雨後過嶽廟遊從封寺觀稼席上

暑雨頻經信宿休近郊方出釋潛憂  
雖妨麥始三停穫

且見苗知一半收

農語有之

神嶽怖民藏電電老松憑寺偃

蛟虬佳游況遇從豐識好飭千倉待有秋

北園秋雨

輕雨來秋晚，郊園對客樽。  
暫和春氣味，將冷雪胚渾。  
聲入關榆苦，陰纏塞嶺昏。  
黃花應自笑，搖落獨承恩。

後園春日

并塞園林古，春來似不知。  
雨輕成凍易，樹老發花遲。  
劇事隨年倦，歡悰入病衰。  
芳時期強賞，宴鼓揭天槌。

過吳兒谷

曉入吳兒谷，危途信不虛。  
千峰疑絕路，一逕俯容車。  
山

鳥過雲語田夫半嶺鋤時平盡周道天險欲何如

觀稼

一夕甘滋起瘁田陡回災沴作豐年便晴惟恐禾生耳  
將熟偏宜穀捺拳雲退不留驅旱迹氣清渾露已秋天  
衰翁豈忘同民樂更覺詩豪似有權

再出行田

豐歲觀農穫先疇路不遐子多宜晚穀生拘就新麻蕎  
麥方含齟蔓菁未入桮鄉民愚自詫太守是吾家

暮春康樂園

榆莢紛紛擲亂錢  
柳花相撲滾新綿  
一年寂寞頻來地  
三月芳菲已過天  
樹密只喧聞鳥雀  
臺高猶得好山川  
病夫不飲時如此  
徒有詩情益自然

庚申相臺閔稼

淫雨農疇害復收  
彼何恩厚此何仇  
高田穀穗拖牛尾  
卑地莊窠沒獸頭  
稔社徹宵喧鼓樂  
災居無日苦飢流  
如云禍福關為政  
安得豐凶在一州

春陰馬上

正是風和日暖天重陰凌擾苦纏綿蕉心自結憑誰展  
柳眼慵開只待眠草濕謾鋪留醉席榆寒難擲買春錢  
幾時霞外氛霾散放出紅輪一文圓

登廣教院閣

岑寂禪扉啓畫關公餘為會一開顏高臺面壘包平野  
老栢參天礙遠山花去春叢蝴蝶亂雨勻朝圃桔槔閒  
徘徊軒檻何時下直待前枝倦鵲還

會故集賢崔侍郎園池再賦

門徑縈紆洞府間，  
無塵外累幽間長。  
楊十丈亂風雨，  
流水數支鳴珮環。  
入戶好峰誰可畫，  
礙人新竹不容刪。  
池亭面面圓荷滿，  
薄暮飛香送客還。

涼榭池上二闕

游鱗驚觸綠荷香，  
水馬成羣股脚長。  
逐浪相追留篆跡，  
偃波垂露滿方塘。

病襟思適繞東塘，  
水荇初花吐嫩黃。  
行困老樗陰下坐，

兒童爭喜拾紅娘

題玉泉院

兩行修栢夾雲根引入蓮峰直下村  
病骨醒魂安氣母幽亭收景厭山孫  
金堆望遠千灘出玉溜聲喧萬馬奔  
坐歎塵勞無計住却尋歸路日黃昏

觀魚軒

雨後方池碧漲秋觀魚亭檻俯臨流  
時看隱荇駢頭戲忽見開萍作隊游  
喜擲舟前翻亂錦靜潛波下起圓漚

吾心大欲同斯樂  
肯插筠竿餌釣鉤

九日水閣

池館隳摧古榭荒  
此延嘉客會重陽  
雖慙老圃秋容淡  
且看寒花晚節香  
酒味已醇新過熟  
蟹黃先實不須霜  
年來飲興衰難強  
漫有高吟力尚狂

九月四日會安正堂

秋光濃拂使君家  
尚去重陽五日賒  
且誦好詩成素飲  
更先諸客對黃花  
池萍漬雨錢錢密  
塞鴈書空字字斜



但縱高吟抒醉膽莫驚搖落動悲嗟

辛亥重九會安正堂

斯堂曾許占風光

去年詩有留與鄰都為故事年年常占好風光之句

須到重陽

復命觴坐上半非前歲客杯中無改舊花香初晴已過  
登高日散慮宜趨自得場唯有一時詩酒戰願開強戶  
振雄鋌

壬子十一月二十九日時雪方洽

近臘猶慳六出繁忽驚盈尺及民寬萬方蒙澤人人賀

通夕無風陣陣乾危石蓋深鹽虎陷老枝擎重玉龍寒  
欲知靈鷲銀為界試陟高樓一望看

再題狎鷗亭

危亭初起俯清潯只得當軒幾醉吟一日鄉園傷驟別  
四年宮闕動歸心簷前好竹今成篠波下修鱗舊種針  
鷗識再來猶不懼向人馴狎似家禽

郡圃春晚

溶溶春水滿方塘欄檻風微落蕊香盡日楊花飛又歇

有時林鳥見還藏  
沉疴不為間來減  
流景知從靜處長  
欲戰萬愁無酒力  
可堪三月去堂堂

畫錦堂再賞牡丹

錦堂重賞牡丹紅  
不惜殘英數日空  
嘉艷豈無來歲好  
清歡難得故人同  
誰言山下曾為雨  
一春無雨只恐身輕去  
逐風且共對花開  
口笑莫持姚左較  
雌雄

暮春書事

榆莢空飛不弄錢  
韶光歸速置何緣  
惜春情味過年少

戰酒英雄退日前竹笋迸堦抽兕角楊花鋪水漲龍涎  
妖妍萬變成凋謝長養須資大夏權

北第同賞芍藥

芍藥名高致亦難此觀妖艷滿雕闌酒酣誰欲張珠網

醉西施

金細偏宜間寶冠

金線冠子

露裛更淡雲髻重

髻子蝶棲

長苦玉樓寒

樓子

鄭詩已取相酬贈不見諸經載牡丹

乙卯晝錦堂同賞牡丹

從來三月賞芳妍開晚今逢首夏天料得東君私此老

且留西子久當筵柳絲偷學傷春緒榆莢爭飛買笑錢  
我是至和親植者雨中相見似潛然



宋詩鈔卷三



總校官庶吉士 臣張能照

校對官助教 臣金學詩

校對官庶吉士 臣陳文樞

謄錄監生 臣觀音保

謄錄監生 臣趙友彬